



IMIBUZO EBUZWA RHOQO

IZithili zoPhuculo lweSixeko (iCID)

Yintoni iCID?

ISithili soPhuculo lweSixeko (iCID) sithetha indawo edityanisiweyo yejografi, echongwe liBhunga ukuba ihlawulise irhafu eyongezelelweyo

kwiipropati ezirhafiswayo phakathi kwemida yalo ukuxhasa ngemali uphuculo nokuhlaziywa kweendawo zoluntu kwisithili. IBhunga limisela indawo njengendawo erhafisayo ekhethekileyo, ethi ke ngoko isebenze njengeCID yokuphucula nokunyusa umgangatho wendawo kwithuba lokuqala leminyaka emi5.

Yintoni isikhokelo solawulo esilawula iCID?

iCID zilawulwa licandelo lama22 loMthetho weRhafu yePropati kaMasipala (iMPRA), uMthetho weNkampani (iNkampani engenzi Nzuzo - iNPC), uMgaqosiseko woMzantsi Afrika kunye noMthetho kaMasipala wesiThili soPhuculo lweSixeko saseKapa ka2023.

Kutheni kusekwa iCID?

Ngokomgaqosiseko woMzantsi Afrika (Amacandelo e152 kunye nele153), injongo yolawulo lwengingqi kukubonelela bonke abahlali bayo ngeenkonzo ezithile ezisiseko ezifana namanzi, umbane, ugutyulo lwelindle kunye nokuthuthwa kwenkunkuma, njl.njl. – ukuya kumgangatho olinganayo. Kuluntu olunqwenela iinkonzo zikamasipala ezikwinqanaba eliphezulu, iCID ibonelela ngokhetho lokuhlawulela ezi nkonzo zongezelelweyo, ekufuneka zifikeleleke kwaye zigcineke.

Zeziphi iintlobo zeenkonzo zikamasipala ezongezelelweyo ezibonelelwayo kwiCID? Ngokuqhelekileyo, ezi ziya kuba zinkonzo ezinjongene nemiba yoLawulo lweDolophu njengamanyathelo okhuseleko olongezelelweyo loluntu, iinkonzo zokucoca, ukugcinwa kweziseko zophuhliso, amanyathelo okusingqongileyo kunye nokungenelela kwezintlalo, njl.njl.

Ingaba ukusekwa kweCID kuthetha ukuba iSixeko sinokunciphisa inqanaba kunye nomgangatho weenkonzo zaso?

Hayi. ISixeko sinyanzelekile ukuba sigcine amaqanaba eenkonzo akhoyo kwaye sibonelele ngeenkonzo ezisisiseko ngokomgaqosiseko. ICID nganye iya kuthethana namasebe ahlukeneyo eenkonzo malunga nenqanaba leenkonzo ezibonelelwa siSixeko kwindawo yayo. Oku kwenza ukuba iCID ikwazi ukunikezela ngeenkonzo ukongeza koko kunikezelwa siSixeko.

Zeziphi iinzuzo ezifunyanwa ngabanini beepropati kwindawo yeCID?

Ngokudibanisa izixhobo zabo kwiCID, abanini beepropati ngabanye banokuxhamla iinzuzo ezidityanelweyo zendawo elawulwa kakuhle ezinzileyo, imvakelelo yokuba neqhaya kuluntu ukhuseleko kunye noxanduva lwentlalo, kunye nokufikelela kumanyathelo adibeneyo afana nokuphinda kusetyenziswe inkunkuma, iinkqubo zokonga umbane, njl.njl. Ekugqibeleni, zonke ezi zinegalelo ekukhuleni koqoqosho kunye nasekungeneni kotyalomali olukhulu.

Ingaba kukho iindidi ezahlukeneyo zeeCID?

Ewe, uMthetho kaMasipala weCID uchonga iindidi ezintathu zeeCID:

- ISithili sokuPhuculwa kweShishini (Ngabanini beepropati zoshishino kuphela abahlawulayo)
- ISithili sokuPhucula ukuSetyenziswa okuXubeneyo (Bobabini abanini beepropati zokuhlala kunye nezoshishino bayahlawula)
- ISithili soPhuculo lweNdawo yokuHlala (Ngabanini beepropati zendawo zokuhlala kuphela abahlawulayo)

Zingaphi iCID ezikhoyo eKapa?

Ngoku kukho iCID ezingama51 kwiSixeko saseKapa. Uninzi lwabanye abahlali bavakalise umdla wokuseka iCID kwaye bakwizigaba ezahlukeneyo kwinkqubo yokusekwa.

Umntu uyiseka njani iCID?

iCID isoloko iqalwa luluntu, hayi iSixeko.

Ngokuqhelekileyo iqala 'ngeentshatsheli' phakathi koluntu oluva kuyimfuneko ukuphucula okusingqongileyo ngaphakathi kwendawo echaziweyo. Abanye abanini beepropati abanengcinga efanayo baye bancelwe ukuba baseke ummeli "iKomiti eLawulayo" ukuba iqale idibane neSebe leCID ngaphambi kokuba iqalise ngokusesikweni inkqubo. Oku kuqinisekisa ukuqondwa ngcono kweCID nokuba yintoni na elindelekileyo kwiKomiti eLawulayo yakuba inkqubo yokusekwa iqalisiwe. Inyathelo elilandelayo iyakuba kukuchaza umda weCID ecetywayo kunye nokubonisana noluntu malunga nokuba zithini na iimfuno zendawo, kunye neBhungana lengingqi malunga neenkonzo zangoku zeSixeko kunye nenqanaba kunye namatyeli okunikezelwa kwazo, phambi kokuba kuqulunqwe isicwangciso soshishini sendlela eziya kuqwalaselwa ngayo iimfuno.

Isicwangciso soshishino esisayilwayo kufuneka emva koko sinikezelwe kuluntu kwintlanganiso kawonkewonke. Emva kwentlanganiso, uluntu luya kuba neentsuku ezingama30 zokungenisa izimvo kwiKomiti eLawulayo ukuze ziqwalaselwe. Intlanganiso kawonkewonke yesibini kufuneka emva koko ilungiselelwe ukubonisa isicwangciso soshishino sokugqibela kuluntu. Ezinye iintsuku ezingama30 kufuneka zivunyelwe emva kwentlanganiso kawonkewonke yesibini ukuze kufunyanwe izimvo ezongezelelweyo ngesicwangciso sokugqibela soshishino. Ukuba oku kukhokelela kulungiso olubonakalayo kwisicwangciso soshishino sokugqibela kuya kufuneka intlanganiso kawonkewonke yesithathu. Ukulandela inkqubo yokubonisana ngesicwangciso soshishino iKomiti eLawulayo kuya kufuneka ukuba ifumane uninzi lwepesenti yabanini beepropati (ngaphezu kwama50% kwiindawo zorhwebo, kwaye ubuncinane ama60% eendawo ezichazwe njengeendawo zokuhlala) ukuze bavumelane ngesicwangciso soshishino kwaye banike imvume ebhaliweyo okanye ukuchasa ukusekwa. Indawo nganye ebhalisiweyo "inevoti" enye ekhoyo.

Yakube ifunyenwe inxaso efunekayo, iKomiti eLawulayo kufuneka ingenise isicelo kwiSixeko ungadlulanga umhla wama31 kweyeDwarha. Emva kokuba iSixeko siqinisekisile ukuba isicelo sisemthethweni, uluntu luyaziswa ngokufakwa kwesicelo nalapho isicelo sinokuhlolwa khona. Isicelo esibandakanya zonke izimvo kunye neenkcaso, sithunyelwa kwiBhunga ukuze siqwalaselwe.

Kwenzeka ntoni emva kokuba iCID yamkelwe?

Emva kokuba iBhunga lisamkele isicelo, iNkampani engenzi Nzuzo (iNPC) enamalungu isekwa yiKomiti eLawulayo ethi ibe ngabalawuli abaseka iNPC. Kwisithuba seenyanga ezi6 zokumisela iNPC iNtlanganiso yaMalungu yokuqala iyabanjwa ukuze konyulwe ibhodi yabalawuli. iNPC kufuneka ibhalise iRhafu yeNtengo ivule iakhawunti yebhanki ize ibhalise njengomnikinkonzo kwiSixeko nakuVimba ongeeNkcukacha zabaNikinkonzo kuNondyebo weSizwe (CSD). Kufuneka emva koko kugqitywe iSivumelwano sezeMali phakathi kweSixeko neNPC esibeka imiqathango ekwenziwa ngayo iintlawulo kwiCID. Konke oku kufuneka kwenziwe phambi kokuba iSixeko senze nayiphi na intlawulo kwiCID. Kunyaka wokuqala isebenza, iNPC kufuneka ingenise isicelo kwaSARS sokungahlawuliswa irhafu

Kwenzeka ntoni xa ixesha leminyaka emi5 liphelile?

Kunyaka ophambi kokuphela kwexesha, iCID kufuneka yenze isicelo kwiBhunga sexesha elongezelelweyo ngokungenisa iSicwangciso soShishino esitsha esixhaswa ngabahlali.

Ngubani olawula iCID?

iCID yiNPC elawulwa yibhodi ekhethwe ngamalungu ayo, kwaye iqhutywa liqela labalawuli abachongwe yibhodi. ISixeko asibandakanyeki kwimisebenzi yayo yemihla ngemihla, kodwa sijonga nje ukongamela nokuthobela umthetho. UCeba wonyulwa nguSodolophu weSigqeba aye kuzimasa iintlanganiso zeBhodi yeCID njengoMakhimkhanyo oququzelela ukongamela kweSixeko kwiNPC.

Ingaba abanini beepropati banalo ilizwi kwiCID?

Ewe, bonke abanini beepropati banokuthatha inxaxheba kwimicimbi yeCID, kodwa ngamalungu kuphela anokuvota kwiiNtlanganiso zamaLungu (umz. iAGM). Bonke abanini beepropati abakwiCID kufuneka benze izicelo ezibhaliweyo kwiBhodi yeCID zobulungu beNPC.

Ngubani onokuba lilungu leCID?

Abanini beepropati abonoxanduva lokuhlawula irhafu eyongezelelweyo, ubulungu babo abuzenzekeli kwakhona bangatyikitya ukuba babengamalungu ukuze bavumeleke ukuvota ngokumalunga nemicimbi yeCID. Abanini beepropati abafumana isaphulelo serhafu abayi kuhlwalulwa intlawulo eyongezelelweyo kwaye abanakufaka isicelo sobulungu.

Ngubani obeka iliso kwiimali?

ICID ilawulwa nguMthetho weeNkampani (wama71 ka2008) ilawula iimali zayo kwaye izinyulela abanikezeli bayo beenkonzo, umcwangcizincwadi kunye nomphicothizincwadi. IiCID kufuneka zingenise iingxelo zemali eziphicothiweyo kwiSixeko rhoqo ngonyaka ukuze ziqwalaselwe kwaye zithiwe thaca kwiNtlanganiso kaWonkewonke yoNyaka (iAGM) ukuze yamkelwe ngamalungu. Ukongeza, iingxelo zemali zenyanga zingeniswa kwiSixeko ukuqinisekisa ukuba inkcitho yenziwa ngokohlahlo lwabiwomali oluvunyiweyo. Zonke iiCID kufuneka zingenise iiNgxelo zazo zoNyaka kunye neeNkcazo zeMali zoNyaka kwiBhungana elichaphazelekayo kunye nakwiCandelo leCID, kwisithuba seenyanga ezintathu zeAGM yazo, ukuze ziqwalaselwe.

Ixhaswa njani ngemali iCID?

ICID ixhaswa ngemali yeerhafu ezongezelelweyo ezihlawulwe ngabanini beepropati phakathi kwemida yeCID. Ayifumani zibonelelo okanye nkxasomali kwiSixeko, kodwa inamagunya okunyusa ingeniso eyongezelelweyo.

Zibalwa njani iirhafu ezongezelelweyo zeCID?

ICID iqinisekisa iipropati ezingaphakathi kwimida yeCID, enxulanyaniswa noqingqomaxabiso lukamasipala ngokuluhlu lwamva nje loqingqomaxabiso jikelele.

ICID qho ngonyaka ilungisa uhlahlo lwabiwomali lulonke lonyaka. Oku kusekelwe kwiimfuno ezithile zendawo njengoko zichaziwe kwiSicwangciso soShishino esivunyiweyo. Igalelo lomntu ngamnye libalwa ngokwahlulahlula uhlahlo lwabiwomali lulonke ngokoqingqomaxabiso lukamasipala lwepropati nganye, ngokomlinganiselo woqingqomaxabiso uwonke weCID.

Umgqonkqubo weCID uvumela ulwahlulo kwiirhafu kwiindindi ezahlukeneyo zeepropati – nokuba yindawo yokuhlala, yorhwebo okanye yoshishino.

Olu luhlu lweerhafu luchazwa njengexabiso kwirandi kwaye lusebenza kunyakamali, oqala ngowoku1 kweyeKhala.

Uhlahlo lwabiwomali lweCID kunye noluhlu lweerhafu olucetywayo kufuneka lwamkelwe liBhunga luze lubhengezelwe uvakaliso lwezimvo neenkcaso njengenxalenye yenkqubo yohlahlo lwabiwomali lweSixeko phambi kokuba iphunyezwe ngowoku1 kweyeKhala.

ICID ilwenza njani uhlahlo lwabiwomali?

ICID yenza uhlahlo lwabiwomali lwayo ngokwegalelo lamalungu ayo ngokweSicwangciso soShishino seminyaka emihlanu esamkelweyo. Nyaka ngamnye, ibhodi yeCID kufuneka ingenise uhlahlo lwabiwomali oluneenkukacha kwiSixeko ngowama31 kweyoMqungu. Uhlahlo lwabiwomali olucetywayo alunakutenxa kakhulu kwisicwangciso soshishino esivunyiweyo kwaye kufuneka ukuba samkelwe ngamalungu kwiAGM yokugqibela, ukuba kukho ukutenxa okukhulu, isicelo ngokweCandelo lama26 loMthetho kaMasipala weCID siyafuneka. ISixeko sivavanya ukufikeleleka nozinzo kuhlahlo lwabiwomali olucetywayo.

Ziqokelelwa njani iirhafu zeCID ezongezelelweyo?

ISixeko siqokelela iirhafu ezongezelelweyo ngendlela efanayo nezinye iirhafu zepropati ezibekwe liBhunga. Iirhafu eyongezelelweyo ibonakala njengento eyahlukileyo (isithili sophuculo) kwiakhawunti yenyanga kamasipala yomnini propati ngamnye onoxanduva lokuhlawula iCID iirhafu ezongezelelweyo ngaphakathi kweCID.

Ingaba iSixeko siyisombulula njani intlawulo yeerhafu ezongezelelweyo ezisemva?

Abangahlawuliyo bafakwa kulawulo lwetyala lweSixeko nakwimigqonkqubo yokuqokelelwa kwamatyala. Ngenxa yoko, zinokunqunyanyiswa iinkonzo zabo zamanzi nombane okanye kubanjwe iziqinisekiso zabo zokosulwa kwetyala.

Ingaba ukuhlawulwa kweerhafu ezongezelelweyo kunyanzelekile kuzo zonke iipropati ezikwiCID?

Ewe. Nje ukuba iBhunga liphumeze iCID, kuyanyanzeleka ukuba bonke abanini beepropati bathathe inxaxheba ekuhlawuleni iirhafu ezongezelelweyo zeCID, ngaphakathi kwemida yeCID. Nangona kunjalo, kukho imeko ezikhethekileyo kwabo banini beepropati bakulungelelo ukungahlawuliswa.

Ngubani onokungahlawuliswa iirhafu ezongezelelweyo zeCID?

Ezi ndindi zilandelayo zabanini/iipropati aziyi kuhlawuliswa i100% lerhafu ngokuMgaqonkubo weCID:

- Amahlwempu, aBantu abaDala kunye naBantu abaKhubazakileyo abafikelelayo kwiindlela zesiqabu zeerhafu
- Iipropati zeBhunga ezisetyenziselwa ubukhulu becala ushishino lukamasipala olusemthethweni
- Iipropati zombutho – ezingenzi nzuzo kwaye zisetyenziswa njengendawo yophuhliso lwabantwana abaselula.
- Iipropati zombutho – ezingenzi nzuzo kwaye zisetyenziselwa uphuhliso lolutsha
- Iipropati zombutho – ezingenzi nzuzo kwaye zisetyenziswa njengendawo yokuhlala kwabo basemngciphekweni
- Iipropati zombutho – ezingenzi nzuzo kwaye zisetyenziselwa ikhaya labadala
- Iipropati zombutho – ezingenzi nzuzo kwaye zisetyenziselwa imidlalo yabasakhasayo kuphela
- Iipropati zeGunya loLawulo lweZindlu zokuHlala ezivunyiweyo zeZiko leZindlu zoLuntu nezisetyenziselwa izindlu zoluntu
- Iipropati zemibutho yamagqala emfazwe nezisetyenziselwa intlalontle yamagqala emfawe
- Iipropati zemibutho yoncedo loluntu nezisetyenziselwa imisebenzi ethile yoncedo loluntu
- Iipropati zoluntu lwenkolo nezisetyenziselwa iinjongo zonqulo ezichaziweyo
- Amangcwaba kunye nendawo yokutshisa izidumbu
- Iipropati zombutho – ezingenzi nzuzo kwaye zisetyenziselwa iindawo zokuhlala izilwanyana
- Iipropati zombutho – ezingangenisi nzuzo kwaye zisetyenziswa njengemyuziyam yasekuhlaleni
- Umhlaba wolondolozo lwendalo

Kwenzeka ntoni ukuba isiseko soqingqomaxabiso siyatshintsha kunyakamali?

Isiseko soqingqomaxabiso sisishwankathelo sexesha (ekupheleni kweyoMdumba) kwaye sisetyenziselwa ukubala irhafu eyongezelelweyo (ixabiso kwirandi) kunyakamali olandelayo. Nangona kunjalo, uqingqomaxabiso lukamasipala lunokutshintsha kunyakamali ngenxa yoqingqomaxabiso olongezelelweyo, izigwebo zeNkundla yoQingqomaxabiso, amacandelwana, ukutshintshwa kokusetyenziswa komhlaba okanye olunye uhlehlengiso. Ukuba isiseko soqingqomaxabiso sithe sehla okanye senyuka kakhulu, iSixeko kufuneka sazise iCID ukuze ihlole impembelelo enokubakho kwirhafu eyongezelelweyo yeCID kunye/okanye kuhlalo lwabiwomali.

Ingaba iirhafu zam ezongezelelweyo zingasetyenziswa naphi na kwiSixeko?

Hayi, zikhuselwe ukuze ziphinde zibuyiselwe kwiCID kuphela.

Buyintoni ubudlelwane phakathi kweSixeko, iCID kunye nelungu / uluntu?

